

## 2 Timoti

### Naoa itəm tatol kəiu lan itəm Pol təməte tuwın kəm Timoti Nəghatən əkuəkır rəha naoa u 2 Timoti

**?Pah təməte naoa u?** Aposol Pol təməte naoa u.

**?Təməte tatuwın kəm pah?** Təməte tatuwın kəm Timoti. Kən in molkeike məmə ilat mın əpəh e niməfak rəha Efesas, məmə okotafin. Afin e “Namusən Əkuəkır Rəha Naoa u 1 Timoti” o nıtunən məmə Timoti in pah.

**?Nəmegəhən tahro nulan nian təməte?** Nian kapman rəha Rom taskəlīm Pol əpəh Rom, in təsətatiğən e kalapus, məto in təmətatiğ e rəhan kit nimə, kən mopael mın kəmotatiğ ilat min motehm məmə in otəsagımən. Namnun japta rəha Wək Min tatəghat-in nian mın əh. Kən əmun kapman təmahl-iarəp in, kən taliwək əm mətan o nup kəiu. Məto roiu əh, tınuwın mın e kalapus əpəh Rom, kən kalapus əh in tərət ikin pahrien. Naoa rəha Wək Min təsəghat-inən nian əh, naoa tınol namnun rəkis. Kalapus əh in tətəp ikin, kən tiəkis o netəmim o nuwınən mətag-pən-in. Luk əm ilau min. Pol təmölkeike məmə Timoti otuwa mehm məto-inu in rəhan fren wır. Kən in molkeike məmə Timoti in otəmik naoa mın rəhan.

**?Təməte naoa u o naka?** Pol təmıtun məmə otəsuwəhən kohamnu in tımıs. Tol nəhlan, in təməte naoa u o nələhəu-pənən niməfak e nelmi netəm-iasol pısın mın neen tahmen e Timoti. Nian iəkis mın koatuwa o niməfak, kən Pol in tolkeike

məmə Timoti otətaskəlīm Namnusən Təwir, kən matətul əskasik e nahatətəən rəhan, kən məsəginən nən-iarəpən Namnusən Təwir, kən in otətul matip o nətoən nahməən e nīpətīn okəmə nəratən otuwa.

*Pol təmən təwir kəm Timoti*

<sup>1</sup> Io Pol, u io aposol kit rəha Kristo Iesu, itəm Uhgīn təmītəpun rəkis io məmə rəhan, kən mahl-ipa io məmə ekən-iarəp rəhan nənīəkisən rəha nəmegəhən lilin e Kristo Iesu.

<sup>2</sup> Iatən təwir kəm ik Timoti, nətik itəm iakolkeike pik ik. Pəs Uhgīn Tata ne Kristo Iesu rəhatat Iərəməərə okuawte-in rəhalau nəwīrən, ne nasəkītunən, ne nəməlinuən kəm ik.

*Pol təmiləs-ipər nətəligən rəha Timoti*

<sup>3</sup> Nian rafin, lapin ne lenian, iatəfak ron ik, kən matən tagkiu kəm Uhgīn ron ik. Kən iatol wək rəhan tahmen-pən əm e tipik min, kən ekītun məmə nolən rat kit təsatīgən lak.

<sup>4</sup> Nīkik tatuəh nahui nəmtəm, kən iakolkeike pik məmə ekəplan min ik pəs nīkik otagien.

<sup>5</sup> Nīkik tatuəh nahatətəən pahrien rəham itəm tahmen-pən əm e nahatətəən itəm təmaupən mətatīg e rəham pipi Lois ne rəham mama Iunis, kən ekītun məmə roiu in tinətātīg lam.

<sup>6</sup> Kən tol nəhlan, iatən min kəm ik məmə onakelel nīgəm rəha nəsanənən itəm Uhgīn təmos-ipinə o nolən rəhan wək. Uhgīn təmos-ipinə nəsanənən əh nian emələhəu-pən nelmək matəfak-pinə lam.

<sup>7</sup> Ol wək e nəsanənən əh, məto-inu Uhgīn təsos-ipamən kəm kitat nīkin rəha nəgīnən, məto

tamos-ipa nĭkin rəha nəsanənən, ne nĭkin rəha nolkeikeən, ne nĭkin itəm tatol nolən mĭn itəm in titun məmə kotətuatip.

<sup>8</sup> Kən inəh, əsaulis-inən o nən-iarəpən İərəmərə, kən əsaulis-inən io itəm etatig e kalapus o nərgin. Məto e nəsanənən itəm Uhgĭn tatos-ıpinə kəm ik, nəkəike mol məmə io ne, itəm iatəto nahməən o namnusən təwĭr.

<sup>9</sup> Uhgĭn təmosmegəh kitat kən maun-in kitat məmə kitat okotuwa rəhan mĭn netəmim itəm kotasim, kən təməsolən o nat kit itəm kitat kəmotol, məto in təmol e rəhan atip nətəligən, ne nəwĭrən. Nian Uhgĭn təməsolən əh nətueintən ne, məto in təmələhəu rəkis nalpəkəuən məmə in otawte-in rəhan nəwĭrən kəm kitat e Kristo İesu,

<sup>10</sup> məto roiu, in təmol əp nəwĭrən əh kəm kitat e nuwamən rəha İosmegəh rəhatat, Kristo İesu. Kən Kristo təmərəkin nĭmısən ne rəhan nəsanənən, kən təmasıəgəpĭn nəmegəhən u namnun tĭkə, kən kitat koatehm e namnusən təwĭr.

<sup>11</sup> Kən Uhgĭn təmĭtəpun io məmə io iəghat, ne aposol, ne iəgətun o namnusən təwĭr əh.

<sup>12</sup> Tol nəhlan iatəto pĭk nahməən ron u ikin-u e kalapus. Məto esaulis-inən, məto-inu ekĭtun məmə pah u iatahatətə lan, kən mĭtun wĭr məmə in titun nehm wĭrən nat naka itəm in təmələhəu-pa e nelmək o namnun nian.\*

<sup>13</sup> Ətəu-pən əm suatip rəha nəgətunən u tətətuatip itəm emən kəm ik, kən ol nat u e nahatətən ne nolkeikeən e Kristo İesu.

**1:7:** Rom 8:15

**1:9:** Efes 2:8-9; Taet 3:5

**1:10:** Hip 2:14

**1:11:** 1 Tim 2:7

\*

**1:12:** Suatip pısın o nəuhlinən ves 12b: “kən mĭtun wĭr məmə in titun nehm wĭrən nat naka itəm io emələhəu-pən e nelmĭn o namnun nian.”

14 E nasituən rəha Narmin Rəha Uhgın itəm tətatiḡ e nikitat, kən atehm wır nat wır itəm Uhgın təmələhəu-pən e nelməm.

15 Nəkitun məmə rəhak min netəmim əpəh Esia, ilat Fukelas ne Hermokenes, ilat rafin kəmotagım rəkis motapəs io.

16 Pəs İərəməərə otasəkitun Onesiforas ne rəhan min, məto-inu nian tepət təmətasitu lak matiləs-ipər rəhak nətəliḡən. Kən təməsaulisən məmə emətatiḡ e kalapus.

17 Nıpahrienən, nian in təmuwa Rom, təmeam-in io, təmeam-in io mətoarus-pən məplan io.

18 !Pəs İərəməərə otasəkitun in e namnun nian! İk nəkitun wır natımnat wır min itəm təmöl kəm io əpəh Efesas.

## 2

### *Mopael təwır rəha Kristo İesu*

1 İk u nətik, pəs Uhgın otol nıkim təsanən e nəwırən itəm tatisi-pən e Kristo İesu.

2 Nəməto rəkis natımnat min u itəm eməḡətun itəmat lan e nıḡanəmti netəmim tepət. Kən os rəhak nəḡhatən mələhəu-pən e nelmi netəmim neen itəm natən nıpahrienən elat, kən ilat okotıtun nəḡətunən netəmim neen min lan.

3 Nian nəratən tatuwa, məto ətul əskasik kitat min ik, tahmen e mopael wır kit rəha Kristo İesu.

4 E nian rəha nəluḡinən, mopael kit təsolən natımnat rəha nəmegəhən rəha netəmim əpnarın əm, məto tatol əm wək rəha mopael məto-inu, in tolkeike məmə rəhan etəm-iasol rəha mopael, nıkin otagien lan.

<sup>5</sup> E nolən kitiah, etəm tətaiu məmə in otol win, in otəkəike mətəu-pən lou mīn rəha naiuən, mətə okəmə təsələn, kən in otəsosən nətouən rəha nol winən.

<sup>6</sup> Tətuatip əm min-nulan məmə etəm tatol pik wək e nasumən, in otaupən məulək-in.

<sup>7</sup> Ətəlīg-in wīr nat naka iatən kəm ik, mətə-inu Iərəmərə otasitu lam o nitunən nīpəti nəghatən mīn u.

<sup>8</sup> Atətəlīg-in Iesu Kristo u noanol rəha Tefit, kən Uhgīn təmosmegəh in e nīmīsən. Kən inu namnusen təwīr iatən-iarəp.

<sup>9</sup> Kən iatəto nahməən o namnusen təwīr əh, kən nīpahrienən, kəməlis io e sen tahmen-pən məmə io iakləh kit o iohamnu itəm. Mətə kəsəlisən nəghatən rəha Uhgīn.

<sup>10</sup> Tol nəhlan, iatətul əskasik e nahməən mīn rafin o netəmim itəm Uhgīn təmītəpun ilat, məmə in otosmegəh ilat e Kristo Iesu, kən ilat okotatig e nəwīrən itəm təhag-əhag rəha Uhgīn, itəm namnun tikə.

<sup>11</sup> Inu nəghatən tatən pahrien məmə, Okəmə kotuwa kitiah e Kristo e nīmīsən rəhan, kən okotəmegəh mīn kitat min.

<sup>12</sup> Okəmə koatətul əskasik e nian iəkis mīn, kən kitat okotərəmərə mīn kitat min. Okəmə kitat kotən-iamnin in, kən in otən-iamnin kitat.

<sup>13</sup> Okəmə kitat kəsotolən rəhatat noanawil, mətə in tatol rəhan noanawil, mətə-inu in otəkəike matol rəhan nolən.

**2:5:** 2 Tim 4:8      **2:6:** 1 Kor 9:7      **2:8:** Rom 1:3; 1 Kor 15:4

**2:9:** Efes 3:1,13; Fil 1:12-14      **2:11:** 2 Kor 4:11      **2:12:** Mat 10:33

**2:13:** Rom 3:3-4; Taet 1:2

### *Iolwək təwîr rəha Uhgîn*

<sup>14</sup> Natîmnat mîn u, onəkəike matən matisimatîp lan kəm rəham mîn netəmim. Ən əskasik kəm ilat nəhlan məmə, “İatən e nərgîn Uhgîn məmə itəmat nəsotərgəhəuən o nîpəti nəghatən mîn.” Nərgəhəuən nəhlan təsasituən e suah kit, məto tatərəkin əm netəmim itəm koatəto.

<sup>15</sup> Alkut əskasik məmə onəkuwa iolwək təwîr itəm nian Uhgîn tatəplan rəham wək, in titun nənən məmə, “Əwəh, nəmol təwîr,” kən nəsaulisən o rəham wək, məto-inu natəgətun ətuatîp nəghatən rəha nîpahrienən.

<sup>16</sup> Məto apəs nəghatən əpnarîp mîn əm itəm kotərat məsotisiai-inən Uhgîn, məto-inu netəmim itəm koatəghat nəhlan, nəmegəhən rəhalat tatuwîn matuwîn əm o nolən mîn itəm kəsotisiai-inən Uhgîn.

<sup>17</sup> Nəgətunən rəhalat in tahmen-pən əm e nîməgəm pien itəm tatəməhal matepət matol iahgin. Təs mil u kioal min-nulan, ilau u Haemeneus ne Faelitas,

<sup>18</sup> itəm kinuəmkarəpən rəkis e suatîp rəha nîpahrienən. Katuən məmə Uhgîn təmol kitat kotəmegəh mîn rəkis e nîmisən, kən okol Uhgîn təsos-ipa mînən nîpətîtat wi mîn nian İesu tatuwa mîn. Kən təs mil u katuərəkin nahatətəən rəha netəmim neen.

<sup>19</sup> Məto tol pap nəhlan, nîmə itəm Uhgîn tatiləkin tatətul tiəkis, kən təməte-pən lan məmə, “İərəməərə titun netəm mîn u rəhan mîn,” ne “Netəm mîn u koatən məmə ilat netəm rəha İərəməərə, okotəkəike

---

**2:14:** 1 Tim 6:4; Taet 3:9

**2:15:** 1 Tim 4:6

**2:16:** 1 Tim 4:7

**2:17:** 1 Tim 1:20

motapəs nolən rat mīn.”

<sup>20</sup> Ətəlig-in-tu. E nimə rəha etəm rəhan nautə tepət, plet pīsīn pīsīn mīn tepət. Kəmol neen e iaen u kol tatipit-ipit, neen e silfa, neen e nig, neen e nīməptən. Wək rəha neen, in wək asol itəm katīsiyai-in. Kən wək rəha neen, in wək əpnapīn əm itəm tol naulisən.

<sup>21</sup> Okəmə suah kit tatol rəhan nəmegəhən tatuwiwi mətapəs nolən rəha naulisən, in titun nolən wək asol itəm katīsiyai-in, kən Uhgīn otələhəu kalīn məmə rəhan pīsīn əm, kən mol əpen-əpenə məmə otol wək mīn itəm kotəwīr.

<sup>22</sup> Aiu muwīn isəu o nolən rat mīn itəm tatəwīə e nīki netəm aluə. Kən ətəu-pən wīr suatip rəha natīmnat mīn u: nolən itəm tətuatip, ne nahatətəən, ne nolkeikeən, ne nəməlinuən. Ətəu-pən suatip əh itəmat netəm mīn u itəm koatətapəh o nasitueən rəha İərəməərə e nīkilat itəm təwīr.

<sup>23</sup> Apəs magīm rəkīs e nəghatən alməl mīn itəm nīpətīlat tīkə. Nəghatən mīn əh koatiuw-pa əm tīməht o nərgəhəuən.

<sup>24</sup> İolwək rəha İərəməərə, okol in təsərgəhəuən, məto in tatəkəike matol təwīr kəm netəmīm rafīn, kən otəkəike muwa etəm rəha nəgətunən, kən rəhan nətəligən kaifəməh.

<sup>25</sup> Okəmə netəmīm neen koatən rat rəhan nəgətunən, kən in otəkəike məgətun wīr ilat e nolən mətig əm. Kən okəm-naka Uhgīn otegəhan-in məmə ilat okotəuhlin rəhalat nəmegəhən, məmə ilat okotitun nīpahriənən,

<sup>26</sup> kən ilat okotuwa mīn e nətəligən təwīr, kən

---

**2:19:** Nam 16:5; Aes 52:11; Jon 10:14; 1 Kor 8:3      **2:22:** 1 Tim 6:11

**2:23:** 1 Tim 4:7

motagim rækis-in noanikulu ræha Setan, itəm təmaskəlīm ilat kən koatol nəwian.

### 3

#### *Nolən rat min iuəhkir o Namnun Nian*

<sup>1</sup> Məto onəkəike mitun nəghatən u məmə nian əskasik min okotuwa iuəhkir o Namnun Nian.

<sup>2</sup> Tol nəhlan məto-inu, netəmim okoatətəlig-in atip əm ilat, kən ilat okotolkeike pik məni. Netəmim okotausit, moatos-ipər atip əm ilat. Ilat okotən rat netəmim ne Uhgın, kən ilat okotəht nəwia tata ne mama, kən okəsotənən məmə nikilat tətəgien o nat itəm katol kəm ilat, kən okəsotisiai-inən Uhgın.

<sup>3</sup> Rəhalat nolkeikeən kəm netəmim otikə, kən okəsotaluinən nəratən itəm suah kit otol kəm ilat. Ilat okotərəkin nərgi netəmim. Okəsotərəməgəən e nolən min rəhalat. Nikilat otəgien əm o nərəkinən netəmim. Okotetəhau nat itəm in təwir.

<sup>4</sup> Ilat kəut kəsua min, kən okotol natimnat rat neen məto kəsotətəlig-inən məmə nat naka otiet lan. Kən ilat okotiləs-ipər atip ilat, kən ilat okotolkeike pik natimnat o nətoən təwir e nipətilat, məto ilat okəsotolkeikeən Uhgın.

<sup>5</sup> Okotol nolən min rəha iəfak min məmə netəmim okotəplan, məto ilat okəsotolkeikeən məmə nəsanənən rəha Uhgın otəuhlin rəhalat nəmegəhən mol kotuwiji. Uwin isəu o netəm min u.

<sup>6</sup> Apəs əm ilat məto-inu neen koatehm suatip o nuwinən latuənu min, kən moatiuw rækis nətəligən rəha nipitan itəm rəhalat nətəligən təsəskasikən. Təfagə rat min rəha nipitan min u, in tiəkis pik



olat, kən nolən rat mɪn tɛpət itəm ilat koatolkeike, koatiuw-pən ilat.

<sup>7</sup> Kən nɪpɪtan mɪn əh koatətəlig-in wɪr e nəghatən mɪn rafɪn rəha netəm mɪn əh, məto ko kəsotɪtunən nəghatən rəha nɪpahrienən.

<sup>8</sup> Aupən ikɪn, Janes ne Jampres kəmatioal tɪməht kəm Moses, \* kən e nolən kitɪəh mɪn əm, netəm mɪn əh koatəht nəghatən rəha nɪpahrienən. Netəm mɪn u, rəhalat nətəligən tərɪoah e nolən rat mɪn, kən nolən rəha nahatətəən rəhalat in neɪueɪuə-əmən.

<sup>9</sup> Məto nəgətun eɪueɪuəən rəhalat, ko təsətulən tuwəh, məto-inu netəmim rafɪn okotəplan məmə ilat kəsotɪtunən nat itəm koatəghat-in, kotahmen-pən əm e suah mil əh.

### *Nəghatən rəha Pol kəm Timoti*

<sup>10</sup> Məto ik, Timoti, ik nəmətəu-pən rəhak nəgətunən, ne nolən rəha nəmegəhən rəhak, ne nat naka itəm ekolkeike məmə ekol, ne rəhak nahatətəən, ne nolən rəha nətəligən rəhak itəm təfəməh, ne rəhak nolkeikeən, ne nətul əskasikən rəhak,

<sup>11</sup> kən nəkɪtun nɪan iəkɪs mɪn itəm koatuwa e rəhak nəmegəhən, ne nolən tərət mɪn itəm katol lak. Kən nəkɪtun nolən iəkɪs mɪn itəm kəmɔl lak əpəh Antiok, ne Ikoniam, ne Listra. Məto Iərəmərə təmɪləs-irəkɪs io e natɪmnat mɪn əh rafɪn.

<sup>12</sup> Nɪpahrienən, netəmim rafɪn itəm kotolkeike məmə okotol nolən itəm Uhgɪn tolkeike, kən motol e Kristo Iesu, netəmim okotol tərət kəm ilat,

---

\* **3:8:** Janes ne Jampres, ilau iəmɪk nərik mil rəha kɪg rəha Ijɪp.  
**3:8:** Eks 7:11    **3:11:** Wək 13:50; 14:5; 14:19    **3:11:** Sam 34:19  
**3:12:** Mat 16:24; Jon 15:20; Wək 14:22

<sup>13</sup> mæto nian kitiæh min æm, nol tæfagæ rat min ne netæm ræha neiueiuææn, ilat okotol nolæn rat motuwîn kol itæm in tærat agin. Ilat netæmim kateiuæ-in ilat, † kæn ilat okoteiuæ-in pik agin-æh netæmim.

<sup>14</sup> Mæto ik, Timoti, onakækæike matætæu-pæn æm natimnat wir min itæm kægætun ik lan itæm næmæn æskasik rækis nîpahrienæn lan, mæto-inu ik nækitun wir netæmim itæm kægætun ik lan.

<sup>15</sup> Kæn nian næmatækæku mætoarus-pa u-roiu, næmitun Naoa Ræha Uhgîn itæm titun nos-ipænæn nenatigæn mæmæ nækitun nosæn næmegæhæn lilin lan o nahatætæn e Kristo Iesu.

<sup>16</sup> Næghatæn min rafin e Naoa Ræha Uhgîn, kægætun-pæn æm e nohli Uhgîn, kæn koatasitu etat. Koatægætun kitat, moatæniæp nolæn rat min ræhatat, moatæg-ætuatip-in kitat, kæn moatægætun kitat e nolæn min itæm kotætutip.

<sup>17</sup> Koatasitu etat næhlan mæmæ, kitat netæm ræha Uhgîn, okotos nasituæn rafin min æh, kæn motuwa netæmim itæm kotitun nolæn wæk min rafin itæm kotæwir.

## 4

<sup>1</sup> Timoti, oekæn-ipinæ næghatæn keike kit kæg ik e nîganæmti Uhgîn ne Kristo Iesu itæm otakil nolæn ræha netæmim rafin, netæm koatægægæh ne netæm kægætun, kæn oekæn-ipinæ næghatæn u mæto-inu in otuwa min matæramæra. Kæn inæh, iakatækæike matæn kæg ik mæmæ,

<sup>2</sup> æn-iaræp næghatæn ræha Uhgîn, kæn ætul matip o næn-iaræpæn, nat æpnapin mæmæ otimætig æm, o tiækis. Æg-ætutip-in nolæn ræha netæmim, kæn

† **3:13:** Setan o netæmim pisin min okoteiuæ-in ilat.      **3:16:** Rom 15:4

ən-iəp nolən rat mīn, kən mīlās-ipər nətəligən rəha netəmim, kən nian natol wək mīn u, rəham nətəligən otəkəike məfəməh, kən rəham nəgətunən otəkəike mətuatip məwīr.

<sup>3</sup> Nəkəike mol nəhlan məto-inu, nian itəm tatuwa, netəmim okəsotolkeikeən məmə okotətəlig-in nəghatən pahrien. Məto ilat okotos iəgətun pişin pişin mīn itəm okotəgətun nəghatən mīn itəm ilat əm kotolkeike.

<sup>4</sup> Kən ilat okotəuhlin matəlgilat o nətəlig-inən nəghatən pahrien, kən motuwīn moatətəlig-in namsu eiueiuə mīn.

<sup>5</sup> Məto ik, atehm wīr rəham nətəligən ne rəham nolən mīn e nian mīn rafin, nat əpnapin nat pişin pişin mīn koatuwa e rəham nəmegəhən, kən ətul əskasik nian nəratən tatuwa, kən uwīn mən-iarəp namnusən təwīr, kən ol rafin wək itəm Uhgīn təmos-ipən kəm ik məmə onəkol.

<sup>6</sup> Timoti, ol natimnat mīn əh, məto-inu otəsuwəhən, io ekimis. Kən roiu nəmegəhən rəhak tahmen e wain itəm kīnatəhtəg-pən e olta məmə okul sakrifais lan.

<sup>7</sup> E rəhak fait wīr rəha nahatətəən, ematipin wīr nelmək, kən e rəhak naiuən, io emaiu wīr rəkis mətoarus-pa namnun naiuən, kən io emataskəlim wīr nolən ətuatip rəha nahatətəən kən eməsapəsən wək rəha nən-iarəpən namnusən təwīr.

<sup>8</sup> Kən roiu, lərəməə itəm rəhan nakilən tətuatip wīr, in təmol əpen-əpenə e nətouən rəhak, inu hat rəha etəm tatol win e rəhan naiuən, kən in otəfauin-pa kəm io e nian rəha nakilən məto-inu in təmakil io məmə rəhak nəmegəhən tətuatip. Kən

sənəmә io pisin әm, mәto otos-ipән kәm netәmim rafin itәm kotalkeike moatәsahgin mәmә in otuwa min.

*Pol tәmәn-iarәp namnusән rәha in min neen*

<sup>9</sup> Eam-in uәhai әm rәham suatip mәmә onәkuwa mehm io,

<sup>10</sup> mәto-inu Temas, u tolkeike pik nәtueintән u, in tәmapәs io maiu muwın Tesalonaeka. Kresens tinuwın rәkis әpәh Kalesia, kән Taetas tinuwın rәkis Talmesia.

<sup>11</sup> Mәto Luk pisin әm itımlau min. Tәwır mәmә nian nakatuwa, onakit Mak itәmlau min, mәto-inu in titun nasituән e wәk rәhak.

<sup>12</sup> Emahl-ipән rәkis Tikikas tuwın әpәh Efesas.

<sup>13</sup> Kән nian nakatuwa, onakos rәhak kot itәm emәlәhәu kәm Kapas әpәh Troas, kән onakos min rәhak naoa min itәm kәmaiu-aiu, kән iakolkeike pik min mәmә onakos naoa min u kәmol e nuwigi sipsip.

<sup>14</sup> Suah u Aleksanta itәm etәmim rәha nolән wәk e iaen, in tәmatol tәrat kәm io. Iәrәmәrә otos-ipән nitai nәtouән rәhan o natimnat min әh.

<sup>15</sup> Kән ik min, atәto ik o suah әh, mәto-inu tәtahtosig-in nәghatән min rәhatat.

<sup>16</sup> Nian emaupән mәtul e kot mәmә ekән-iarәp nәghatән min rәhak, suah kit tәmәsәtul-arәpән masitu lak, mәto netәmim rafin kәmotagım motapәs io. Pәs Uhgın nıkin otәsәhtән natimnat rafin itәm ilat kәmoatol.

<sup>17</sup> Mәto Iәrәmәrә tәmәtul e nıkalik mos-ipa nәsanәнән kәm io mәmә ekән-iarәp wır nәghatән

**4:8:** 1 Kor 9:24-25      **4:11:** Wәk 15:37-39; 2 Kor 8:23; Kol 4:14

**4:13:** Wәk 20:6      **4:14:** Aes 59:18; Rom 2:6

rəhan, kən pəs Iaihlua min okotəto. Kən təmiləs-iarəp io e nohli laion.

<sup>18</sup> Iərəməərə otiləs-irəkis io e nəratən min rafin itəm okol kəm io, kən in otaskəlīm wir io, kən miləs io ekuwin e nərəməərəən rəhan əpəh ilis e nego e neai. Pəs kotiləs-ipər nərgin tatuwin matuwin namnun tikə. Əwəh.

### *Namnun nəghatən*

<sup>19</sup> Iatən təwir kəm Prisila ne Akwila, ne Onesiforas ne rəhan min.

<sup>20</sup> Erastas təməsətəu-pa-mən io, in əpəh Korin. Kən nian emiet Maelitas, emapəs Trofimas tətatiğ məto-inu in tatimis.

<sup>21</sup> Alkut pik məməə nakuwa uəhai əm ikin-u, uarisig in nian rəha nətəpən. Iupulas tatən təwir kəm ik, kən Putens, ne Linus, ne Klotia, ne piətət min rafin ikin-u koatən təwir kəm ik.

<sup>22</sup> Pəs Iərəməərə tətatiğ itəmat min. Pəs Uhgın otawte-in rəhan nəwirən kəm ik.

**North Tanna New Testament**  
**The New Testament in the North Tanna Language of**  
**Vanuatu**  
**Le Nouveau Testament dans la langue du Nord Tanna**  
**de Vanuatu**

copyright © 2010 Wycliffe Bible Translators, Inc.

Language: North Tanna

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 18 Apr 2025 from source files dated 31 Aug 2023

46e9a2b5-26b8-5301-a079-623f3a20ef8b